

名

山

藏

名山藏卷之二十六

臣何喬遠恭輯

典謨記

世宗肅皇帝

三十一年正月甲申朔命朱希忠攝拜天玄極殿群臣望朝奉天門大同虜求易菽豆不遂屢寇邊巡按御史李逢時阻之遂入掠諸將禦之皆敗朝議籍籍追咎馬市非計仇鸞慮譴請選宣大精銳兵萬人發白金二十六萬爲戰資上不許諭嚴嵩曰金民血也鸞去歲調兵不一戰費軍興數百萬卽戰當何如其

第令戰已亥月食虜犯大同益數上曰邊臣恃市不備也從今一意戰觀望者重刑於是仇鸞請逐虜上曰虜少入耳毋煩卿禮部尚書徐階言周人愛君拳拳億祝虞廷命官諄諄胄教皇子年十有六選婚講學實維其時然必冊立先之名位定然後可次舉臣實司禮敢昧死言上曰二子年及卽以本禮舉冠婚何害何乃逼君其卽具冠婚儀奏階請先冠裕王次景王婚亦如之則暫於內宮上曰婚出府故事也何暫於內宮嚴嵩對曰冠同日婚出府故事王也裕王將爲太子焉上曰二王同體其以三月冠婚次之治

二府二月更名西苑御宮爲永壽宮宣大二鎮大饑
人相食令督餉侍郎馮坤發白金十萬往賑之以兩
鎮巡撫何思蘇祐不奏報罰其俸虜酋俺答擺腰等
糾聯部落移帳天城並虜塞駐牧警報日夕至建春
告大齋朝天宮舉大祈歲典五日以太上道誕建醮
永壽宮九日示百官勿謂弗經欺玄而謗上勅故工
部侍郎陸杰齋白金十一萬修玄帝宮於太和山上
諭禮部春半土燥布種恐難其命文武大臣爲農借
雨各宮廟以青衣角帶行禮虜大入大同威虜等堡
指揮僉事王恭死之宣大總督侍郎蘇祐不以聞而

以虜騎三萬入報俄大同巡撫都御史何思報虜退
則亦不言虜衆寡與所從出入處上心疑之令飛騎
往偵二千耳王恭死焉遊擊呂勇劉潭參將張騰孫
麒焦澤總兵王懷邦皆逗遛退縮不力戰上切責祐
思妄言命錦衣衛械繫麒潭京師革懷邦澤勇職級
使帶罪自效贈恭官廕其一子吏使了頭智求市大
同命斬而梟之諸鎮乃詔仇鸞往逐虜三月修歲例
典洪應雷官六日冠裕王景王禮科給事中迺奏乞
命二王出閣講學禮部爲覆請上曰朕已與卿等久
計更待迺言彼竊以瀆宜參究之乃借以請京管遊

將軍時陳自言遇虜大同西戰十合敗之追奔三
十餘里虜二萬騎奄至與戰兩日乃解上曰時陳勇
其母侍御史覆實厚賚之四月上諭嚴嵩曰朕二子
近議出閣禮部何久未請者徐階上疏請期上復曰
茲逼夏杪無幾何時其待秋爽掌詹事府事尚書孫
承恩曰臣備宮臣職輔導敢固以請上曰雷久不聲
占云臣專果适不奉君卿未可附和虜入遼東新興
堡堡百戶常祿指揮姚大謨劉棟劉啓基死之備禦
指揮王相勒兵四百人赴之力戰二日與指揮張策
百戶程克政胡鎮皆死之予相贈官賜祭葬廕其一

子祿策等皆贈官子孫各陞襲三級仇鸞言臣帥師出邊行二百餘里遇伏我軍陣亡二十八人傷二百一十二人失馬二百餘匹斬虜首五級獲其馬三十請如賞時陳者賞諸軍兵部言鸞出師伐虜不能取全勝斬獲少損傷多宜下御史問狀何得引時陳者上曰諸將久暴露遂賞仇鸞等有差徼人王直者爲倭僧故都御史朱統嚴海禁絕倭海上諸豪遂負倭所市倭失貨競責直直無所出亡據海島上因聚亡命徐海陳東等爲將領數勾引諸倭奴入寇浙東至是倭萬餘人駕船千艘燒劫温州諸郡破黃巖掠之

七日其後猖獗浙直中東據柘林海據乍浦凡六年
乃絕五月旱禱雨既雨群臣賀上曰今虜脇降三衛
勢甚張諸邊相繼告急修邊二年百無一效內外官
有幹國如家者耶虜創必肆秋犯如玩者軍法治之
增設兩淮等處巡鹽御史一員七月乙未月食以倭
起復設巡視浙江兼管福興泉漳都御史總督軍務
以王忬爲之先萬壽節建醮大高玄殿二十五日八
月廬江王祐楫獻瑞穀薦廟受賀建壽旦醮朝天宮
三日夜萬壽節命朱希忠攝拜天玄極殿羣臣望朝
奉天門乾光殿成仇鸞死上聞其通虜狀命剖棺斬

首梟示九邊鸞父母妻子及鸞家丁時義黨侯榮姚江皆論斬沒入其男女貲財家屬黨與流配之虜大入大同九月大掠大同馬邑朔諸處以仇鸞誅親舉謝典內殿五日遣告謝二郊社稷宗廟先師帝王詔天下百官表賀革戎政廳凡鸞所改置戎政悉罷之修秋報大齋朝天宮三日夜虜大攻山西三關不克引去悉罷諸邊馬市鳳淮揚徐水賑之遣科道官巡視太倉銀庫著爲令十月南京試御史王宗茂極論嚴嵩奸貪出爲平陽丞兵部尚書趙錦坐先附仇鸞戍極邊虜寇遼東岷王譽榮薨十一月張岳盡平湖

貴苗建秋報歲典於洪應雷宮冬至羣臣望朝奉天
門十二月光祿寺少卿馮從謙言提督光祿寺太監
泰乾沒內帑以萬計巡視給事中允中御史斯彬亦
劾泰如從謙言泰誣奏從謙盜用大官食物誹謗上
奉玄不忠狀上命逮鎮撫司訊之訊上泰所引從謙
誹謗語曖昧無證不足深誅上責鎮撫司奪其俸曰
從謙罪如子罵父者律曷不究也因降允中斯彬邊
方雜職從謙泰下法司擬罪法司坐從謙邊戍泰送
司禮監奏處上以泰能舉發欺謗臣免之廷杖從謙
午門戍烟瘴從謙死杖下虜寇寧夏大殺掠封慶庶

子熹枋爲慶王修謝歲典于內殿命大臣祭告六宮
廟百官吉服齋戒法司停刑五日雪百官表賀

三十二年正月戊寅朔命朱希忠攝拜天玄極殿壬
午日食雪不見上曰日食不顯露雪瑞旋荷天恩不
可不知其奏謝郊廟社稷先是孝烈皇后祔廟之議
自上發之禮科都給事中楊思忠與徐階議不可上
銜之至六科官上表賀正楊思忠爲首上摘表中語
詰之曰申錫玄禧是何文體廡思忠不臣久歲其杖
之午門之外百發爲民餘罰一年俸遣禮部左侍郎
孫陞建安神鵲於承天元祐官癸巳月食嚴嵩請婚

二王於內府上曰何搖外議也則立爲太子矣夫出府不可如何害及二王如何害及朕者卿明言之嵩言儲位未有所屬同居於外危疑易生嫌隙易起臣所爲二王慮者也先朝有太后有中宮東宮體勢增重主上尊安今烈后上賓至親獨二王乃皆在外臣所爲聖躬慮者也上曰無庸有能勝天乎已禮部擬上婚禮稍分別上曰旣王矣何異之有爾等卽舉冊立禮勿煩朕也禮部以爲然具儀上上曰豈有朝更暮改者其一如王禮元江賊平召還楊繼盛爲兵部員外郎繼盛至復極劾嚴嵩專權曰陛下不信則請

名二王面問之上曰廡繼盛本心探測朕意故引二
王好無上也錦衣其杖之百四杖一更人已下刑部
尚書何鰲當詐傳親王令旨律絞上曰姑如擬猶輕
鰲等不執法重論尚請朕憫狂黨邪廢法也其降俸
一級郎中史朝賓降三級外調之嚴嵩引罪求去上
曰羣臣細醜已結爲黨彼物明言逆賊勾虜其本在
卿顯然指卿贊直玄脩不朕阻抑實誹君詈上朕非
內色外禽者等享有天命崇寧太上又與宋徽梁武
大不同人臣如此買直邀譽卿若引罪真墮邪孽計
皇天鑒臨神明左右宜贊佐奉順毋生去心特旨以

薛豹爲兵部尚書二月庚戌冊李氏爲裕王妃乙卯
冊王氏爲景王妃皆出就府建春告大醮于朝天宮
三日夜羅田縣省祭官緯進白兔賞金幣徐邳水甚
命河道御史曾鈞濬黃河下流以通漕遣刑部左侍
郎吳鵬往賑之初楊繼盛之劾嚴嵩也謂今工部尚
書歐陽必進故嵩中表嵩私之以爲兩廣軍門必進
就中爲嵩孫鵠冒功得錦衣至是必進上書自理下
兵部覆嚴世蕃自爲草授郎中周冕使覆奏冕封奏
世蕃草劾之上曰廝冕不俟部覆自以意肆報復杖
而黜爲民嵩因爲鵠辭職許之倭犯溫州參將湯克

寬破之虜犯宣府參將史錄死之予贈廕賜祭葬祠
死所三月建祈年大典于大高玄殿陝西山東大饑
賑之巡按雲貴御史趙錦論劾嚴嵩亦及嚴鵠嵩歸
第待罪上曰錦明謗君其械繫京師治之遂復鵠官
名嵩立入直及錦至廷杖黜爲民虜入宣府犯河曲
遊擊孫邦丁碧戰却之尋犯深井堡總兵郭都死之
虜犯延綏總兵劉梅死之上賜邦碧金幣予都梅贈
諡祭葬祠廕建祈年典于洪應雷壇兼求雨焉復城
外城閏三月以大道殿成建景命吉典九日王直勾
倭大寇江南濱海諸郡至于淮北破昌國衛屯之五

日參將俞大猷以舟師逐去之直復勾倭攻陷臨山
衛城四月旱禱雨內殿營宜春宮建吉典雷壇仙宮
停封十三日革新設招撫徐淮山西屯牧清理鹽法
及巡撫昌平四都御史浙江舟師破賊松門港倭犯
太倉平湖海寧破上海海舟大掠南直隸浙江諸郡
復破浙松陽松陽知縣羅拱辰戰却之五月倭入上
海屯之七日倭陷乍浦所流劫寧化奉化參將湯克
寬火之於民舍餘倭逃虜犯遼東設提督海防總兵
以湯克寬爲之建景命典于乾光宇六月荆王厚烜
薨七月禮部爲二王請入賀萬壽上曰未命攝祭其

待明秋自是凡萬壽節禮部爲二王請賀皆不許建
生辰醮于雷壇上諭禮部朕丕承父天母地洪眷大
道帝師匡扶內宥殛滅外虜平寧恩祐加隆勿謂邇
君弗似臣隣之義茲月下旬及八月初旬高玄等壇
修景慶等儀其毋違怠以爲民先虜入渾源東寧廣
昌命王忬提督軍務巡撫浙江兼福興泉漳地方虜
攻挿箭浮圖等峪固原遊擊陳鳳寧夏遊擊朱玉擊
退之上大悅命卽加陞爲都督僉事毋待勘報八月
虜犯蔚掠代繁峙諸處復犯宣府塞吏部尚書萬鏜
推通政使趙文華爲鄖陽巡撫兵科右給事中朱伯

辰論劾文華宜罷文華言伯辰劾奏皆鏜嫉之因言鏜怨望上黜鏜并伯辰爲民留文華如故復召李默代鏜萬壽節命朱希忠攝拜天玄極殿羣臣望朝奉天門虜駐鄜延掠延慶諸州河南盜師尚詔山東盜李自名等作亂九月虜犯大同塞總兵李涑參將馮恩遊擊李桂等死之皆賜贈諡祭葬有差祠其處虜從紫荆關浮圖峪分突山西取道宣大諸鎮兵前後邀擊之于廣昌靈丘代蔚至磁窯口中伏而去捕斬凡三百餘級上曰是皆文武衆臣之勳士卒效力然豈無天祐神助故以歸報天神爲正遂祭告二郊宗

廟社稷先聖帝王乃論諸鎮文武臣功有差建秋報
大齋大高玄殿七日朝天宮三日師尚詔平饑免廬
鳳淮揚諸州縣衛所稅糧有差勅賑之十月賑畿內
諸府及宣府遼東山東河南并蠲賑浙江被寇諸縣
建秋報大典于洪應壇九日修南京皇城倭復自華
亭登岸泊寶山湯克寬擊勝之常熟知縣王鈇禦倭
福山勝之計三中武科者會試著爲令遣行人東萊
勅諭南直隸山東撫按官破格賑饑以南京兵部侍
郎謝存儒故巡撫河南時不能弭師尚詔盜械治於
京師京師大饑上問嚴嵩京師饑曷處之朕聞外省

饑民亦來奔就必有斃道路其發太倉米十萬以六分平糴四分給四來貧苦者外城成十一月倭犯上海嘉定冬至羣臣望朝奉天門建景命圓慶典于仙宮九日十二月禱雪禮部言畿甸災難爲郵冊封宗藩請如古孟夏封諸侯禮移之來歲四月詔可著爲令修歲成大典十四日雪羣臣賀以天臘節建醮大高玄殿停封二十八日取大倉庫銀十萬爲內供嚴嵩言中外望陛下立太子請舉之明春上日昨月下旬朕景命慶圓下令臣民毋欺怠卽次日逆惡邪物造言朕躬不豫朕久聞沸騰之言謂諸事皆卿仲文

爲之卿仲文不言卽言朕無不立太子者卿疏自解是矣恐非安上敬君之祝

三十三年正月壬寅朔命朱希忠攝拜天玄極殿百官望朝奉大門建元日醮大高玄殿停封事二十八日以六科給事中思靜等賀表不上書萬壽者各逮杖之午門上諭嚴嵩曰卿昨奏立太子老忠慮國亦固然已然朕一切政體未失止風興不一坐臣又皆逸今朕以一王猶監國者何如嵩對曰中外臣民謂它無敢請立太子者獨咎臣不言臣是以言臣所請者禮也非謂政上乃已康妃杜氏薨冊諡曰榮淑發

太倉賑饑民之就食京師者百里以內人三升遠者
遞加至二十升而止停邊選例倭久泊崇明南沙至
是潰圍出海轉掠蘇松諸州縣二月建春祈大齋朝
天宮三日夜大祈歲典三日倭攻松江官兵追戰敗
績巡按直隸御史慎劾奏應天巡撫都御史彭黯陞
工部尚書卽上官不待代坐令倭知調度無人馳突
益甚乞重治以警臣偷上命械繫京師黜爲民三月
吏部舉江西左布政陳洙代黯上曰倭方棘洙勝黯
否或遠不能旦夕至其再擇乃改兵部右侍郎屠人
山兼都察院右僉都御史兼巡撫督糧焉命建顯陵

殿規制如景陵御史何廷鈺條時政八事下戶部戶部以其迂闊格不覆奏廷鈺詣郎中劉爾牧趣之爾牧敏悍善籌戶部尚書鈍所倚見廷鈺而傲廷鈺言比陛下戒戶部節財爾牧外爲謗毀言今縣官賞不博而費無經大自泥沙安得責戶部上曰朕奉玄卽取太倉儲豈能百萬廩爾牧敢以不節無名謗朕卽如修邊一費侵欺千倍有言及否其逮杖之午門百發爲民上曰朕惟逆賊犯闕後連歲凶饑惻然念之今恤民養軍爲要兩者得人雖患不害吏部其令有司加恤災處奏遷尤異重刑其貪殃者諭兵部責實

邊鎮將官撫士而飭兵政焉以四方災異建新祐典
七日倭掠蘇松參將湯克寬擊敗之採溯港建景祐
吉典于大道殿七日倭掠通泰等城餘衆漂入青徐
界李自名平四月上曰春雷未聲四方旱澇交災勿
地咎君天工人代當責臣勞其遣張溶等祭告各官
廟停常封九日京師大疫上曰疫甚死亡塞道朕甚
傷焉太醫院其藥療戶部發米五千石粥之死者官
藁瘞毋暴露天地間以瀆廷試歲貢士上親擢何炯
爲第一衡永盜起倭寇嘉興伏殺官軍於孟家堰都
司周應禎指揮李元律千戶薛綱宋應瀾百戶趙軒

梁瑜俱死之倭轉陷嘉善攻嘉興府副使陳宗夔戰却之賊逃入乍浦與長沙寇合犯海寧諸縣復轉破崇明知縣唐一岑死之上曰朕雖廢朝此心勝于而坐居常念邊宣大總督蘇祐朕聞其衰兵部尚擇人代之虜大掠宣府嵩峪紫溝等堡五月以地臘節醮內殿七日倭大掠蘇州轉入崇德和順民文英獻瑞兔賞金幣壬子月食以南京兵部尚書張經兼都察院右副都御史總督南直隸浙江山東兩廣福建等處軍務大勦賊募山東兵禦倭六月虜犯大同五堡總兵岳懋迎擊之與指揮僉事薛葵陷陳力戰死子

懋贈諡祭葬立祠廕一子綦亦予贈祭葬附享于懋
祠倭繇吳江轉掠嘉興肯王涇而陣我兵與戰大潰
指揮夏先死之賜贈祠總督宣大侍郎許論言岳懋
新敗虜日屯聚左右衛聲息旦夕而軍缺馬少芻糧
不備不足以戰乞勅兵部計處之兵部言先任巡撫
久不以芻糧給士以故宣大士馬多物故上命械繫
前總督宣大蘇祐及大同巡撫都御史侯鉞來京治
之尋黜爲民切責戶部尚書方鈍等遂以戶部右侍
郎陳儒兼都察院右僉都御史往賑并覈其見在芻
糧軍馬有不足者計處之上諭嚴嵩曰倭虜兩犯朕

甚念之有爲國真忠之臣不遂特旨以王忬爲右副都御史巡撫大同京師淫雨漂沒民廬賑之七月倭自蘇州流劫嘉善縣轉趨松江出海參將俞大猷擊敗之鄭王進瑞穀禮部請告獻受賀上曰今夷狄作欺大水疫荒任事之臣不思處置坐喜禍亂謂盡繇朕安用強以賀天錫玄麻不可慢忽其告獻上曰水災兵荒劫數已定匪天災人實人自招我累年經歲爲民切求下當我感乃臣欺民愚覆謂我迷天監大昭西苑果育瑞禾百十五本麻祥隱出語爾衆知建啓祝醮於西苑停封五十五日取太倉銀十五萬爲

內供官兵敗倭於長礁南海中焚其舟上曰今者水
居庸古北如河虜料不能逞當備水落耳兵部其先
計上曰自古君臣元首股肱未有不體一之關也直
贊事玄第希忠嵩兩人者親臣其增駙馬都尉景和
安平伯承裕文臣增吏部尚書默禮部尚書用賓武
臣增左都督炳馬撰述玄文則選侍從文學之臣四
人充之於是吏部侍郎程文德郭朴禮部侍郎閔如
霖吳山當其選發內帑銀萬兩修泰山神廟八月以
萬壽節加恩賚朱希忠陶仲文各一子爲錦衣百戶
嚴嵩子工部侍郎世蕃添註管部事徐階兼太子太

傳武英殿大學士李本太子太保文淵閣大學士餘
官如故高士中輔正一等官王弘賓道士楊常靜皆
加道號有差嵩以世蕃故不繇科目辭管事許之萬
壽節命鄔景和攝拜天玄極殿羣臣聖朝奉天門虜
十餘萬騎分掠平虜衛等處至于朔州嘉興倭還屯
松江柘林川沙窪二處進薄嘉定城參將李逢時以
山東兵六千人敗之趣戶部買龍涎香山東兵乘勝
擊倭採淘港大潰命械繫故巡撫屠大山參將許國
李逢時副總兵明道京師黜大山爲民國等皆論死
虜犯宣府小白陽堡九月建秋報大齋朝天宮三日

夜虜犯紅井官兵襲敗之徙樂昌王府於朔州文華殿辦事工部侍郎談相者故以善書幸假歸屢稱病緩期上惡其慢速斬之再建秋報大齋朝天宮二日夜倭犯海門副使張景賢擊敗之虜寇平虜城至山西境官兵擊走之鄔景和在直當撰文辭不諳玄理上不悅罷之時醮清馥殿景和方進香聞命遂趨出醮成上賞諸臣銀幣景和與景和言臣無功受賞請許臣辭它日將劾褻革銜環以報上大恨其不祥曰褻革銜環願君耶黜爲民十月虜盡銳攻龍王谷輒堞兒日數十進我軍憑牆擊之虜被傷轉攻沙嶺孤

山口俱不克遂薄攻古北口及平虜衛薊鎮牆警報日數十至使覘之則薊遼總督兵部左侍郎楊博方擐甲登埤宿止古北口垣上總兵周益昌率將士圍牆甚力上大悅遣使者齎白金萬兩以厲士賜博益昌服色衣人一襲博夜遣死士斫虜營虜驚遽博以聞上曰彼醜視我若戲輕去來雖遽備毋怠是時虜以六萬騎寇山西三關總督侍郎許論擊却之亦捷聞上論嚴嵩曰爲政在明賞罰近各總督鎮巡官戮力堵賊懼失事法不貸耳然不可忘備通虜者妖賊呂鶴就擒論宣大山西諸臣功有差海賊犯潮州指

揮黑孟陽引舟師殲之建秋報醮典洪應壇七日改
張經爲右都御史兼兵部右侍郎專一總督軍務剋
期平倭經奏調田州東蘭那池南丹歸順等州狼兵
永順保靖二宣慰司土兵助戰從之上曰今歲諸鎮
連有斬獲虜遺挫不能入犯皆仰天祐其告謝郊廟
社稷先聖帝王十一月舉謝玄大典內殿論薊鎮宣
大守臣禦虜功大陞賞冬至羣臣望朝奉天門修景
慶玄脩醮於西苑九日倭犯松江據柘林復犯嘉善
轉掠嘉湖二府都指揮劉恩擊却之十二月禱雪各
宮廟京城內外盜起雪未應禮部請再祈上曰朕欽

玄膺佑今夏秋雨水雖多已苑田嘉禾特出五穀之
精乃寶也茲不敢要速效于神其兼舉祈報典焉
三十四年正月丁酉朔命朱希忠攝拜天玄極殿羣
臣望朝奉天門柘林倭陷崇德轉攻德清二月虜分
寇宣府懷來龍川門城等處工部右侍郎趙文華致
仕侍郎朱隆禧各一陳備倭之策文華言七事其一
請祭告海神隆禧請增置巡視浙福都御史一員并
開互市禁兵部尚書聶豹覆上文華疏有寢有行格
隆禧不覆奏上諭嵩南破北虛倭尤甚本兵若罔知
者文華隆禧既不比泛奏當有依准卿其集部科示

之抑令豹自以忠猷告祖宗養教恩深豈可忍譴時
君忘先聖大德豹震懼請罪因言文華疏臣業覆上
隆禧之議若增設巡視則見謂官多擾民開通互市
則見謂示弱外醜是以不敢覆請上曰朕欲豹忠猷
入告今何有其更悉心計對豹益惶恐上便宜五事
上曰爾職本兵坐視賊欺不設一策半勦諭問乃汎
對其降俸二級因奪侍郎溥等俸降所司郎中重二
級外調之勅責張經亟勦賊毋使師老上曰大祈玄
撰臣下有暗欺者程文德作可見今吏部以爲南冢
宰豈彼謂朕奉不經欲自脫去其南調之爲工部左

侍郎文德疏謝上曰猶懷訕黜爲民如趙文華請遣祭告海神兼視江南倭虜犯薊鎮參將趙傾蔡指揮褚文明李德周官千戶黃世勳段啓百戶孫世爵等皆死之賜祠祀贈廕有差建大祈歲典六日上諭在直八臣曰吏兵二正祖宗朝常慎其選矧今中外多事兵正或衰卿等評之豹引疾乞休上特命閑住去下吏部別推吏部舉許論楊博上諭嵩曰是官須得精健者論亦衰博可三月建祈年醮洪應雷壇七日建神應軒于西苑上曰朕奉洪應祈典之中辰下役不敬以是不無欺誹者豈可諉爲數有而快其謗志

其復啓壇脩七日毋怠蘇松兵備副使任環以舟師

擊倭南沙勝之

任環字應乾潞安人舉進士知廣平沙河滑三縣陞蘇州府同知嘉靖癸

丑倭寇東南是時天下承平久吏民不知兵革賊至輒奔以潰環獨訓練所統民兵與力戰躬介青策馬先之自書姓名於腹背手足曰死戰吾責也雖然先人遺體則不可棄茲用以識庶得收葬焉聞者感泣環又與其兵同寢食或連日夜糧未入口或露宿草莽植立泥淖中未嘗稍自異所得俸直及諸上官之牢醴悉分與其兵繇是兵亦日奮敗賊於上海之人圍方戰時寇拔劍擊環頓庖人身蔽免然猶被三劍斃守大倉以積勞疽發背環子請環還部就醫環叱曰吾誓不與賊俱生幸吾疾愈而賊氛否則有臣死忠妻死節子死孝而已歸以是語爾母吾不能浪浪沒真婦子對泣喘溺間也會報賊至環裝奮出海擊之怒濤如山舟人皆震眩失色環意氣彌厲手劍麾舟師擣之賊大敗得斬首餘未幾又敗之陰沙敗之保山敗之南沙賊望見環旌旗輒遁去捷聞擢山東按察僉事遷蘇松兵備甲寅賊厄蘇民爭走

入城聚保門編民相抱號哭聲震原野環亟命啓門
日賊入者某請任責活以數十萬人明日賊至計敗
之葺門乙卯賊復大至復大敗之斬首六十餘級詔
進副使賜白金文綺縵一子副千戶世襲丁母憂部
使者及諸士民連跪起環詣贈環母爲孺人起之蘇
環不得已受命明年倭寇平乞終制報可仍陞山東
布政參政以旌其功又明年丁嫡母
憂居二年卒年四十贈光祿寺卿

四月封荆世孫

翊鉅爲荆王岷世子定耀爲岷王田州土官婦瓦氏
與東蘭等州各領狼兵應調至總督張經使總兵俞
大猷湯克寬分領之會趙文華至方銳破倭狼兵貪
數請戰一敗於漕涇再敗於金山而文華意尚銳直
謂倭易平數趣經以狼兵戰經念欲待保靖永順兵
至與犄角圖萬全謂兵事秘不輕語文華文華怒上

言經玩寇殃民今猶臣與巡按御史宗憲時時在行
間也頃之永順保靖兵至副使任環領保靖兵攻三
丈浦倭於江陰村破之倭犯淮陽通州鹽城等處參
政張景賢禦之狼山亦敗之虜寇青邊口宣府參將
李光啓等率衆禦之兵潰被執奮氣大罵遂與指揮
黃添祥尚真蔡隆千戶郝廉賈璽尚志百戶郭勳王
永同死之詔賜祠贈廕有差五月柘林倭與新倭突
犯嘉興經令參將盧鏜與俞大猷等領永順保靖兵
分部水陸夾擊之遂大破之王江涇擒斬千八百九
十有奇餘寇溺者稱是川沙窪倭出海流劫崑山縣

江北倭自日照流劫東安衛至于贛榆復至海州沐
陽桃源諸處官兵殲之於徐邳而江北倭平倭復自
海上大至流劫蘇常間王江涇之捷大捷也而趙文
華所論張經狀已至上前上怒問嵩嵩對如文華指
遂命械經及湯克寬于京師以應天巡撫都御史周
琬爲兵部侍郎兼右僉都御史代之上曰鸞勾北賊
旣刑經結南寇又作是隣哉之義耶經罪不貸文華
殺之是皆仰叩玄威其遣朱希忠分告于宗廟社稷
神祇先聖有頃王江涇捷聞兵科都給事中用敬等
言王江涇首功千計東南用兵以來未有捷若此此

倭亡我奮之時未宜易帥正當令張經乘勝掃除之
請姑召還錦衣使者再觀其成敗卽敗逮經未晚也
上大怒曰張經欺怠不忠不文華奏不戰廝輩黨奸
惡直沮法壞上其各杖五十發爲民已上心疑之以
問嚴嵩嵩終陷經而稱御史胡宗憲與文華殺賊功
爲請賞上曰令文華不言者又復失賊遂遣使賞文
華宗憲令竭忠督討仰贊玄威柘林倭焚焚巢出海俞
大猷等破蘇州倭於陸涇垣倭寇常熟知縣王鈇鄉
官參政錢泮率兵禦之不克死之各予贈廕祭祠上
曰故工部左侍郎郭文英出身工匠久竭勤勞今家

人乞祭葬其與之仍加祭壇上諭戶部龍涎香訪取
十餘年矣不得分毫始梁材笑上曰載籍不紀則成
祖作永樂大典僞乎其再求之海濱必得之六月倭
從海上至犯上虞會稽破杭州流劫而西俞大猷遮
洋擊三丈浦倭勝之賊遯海上之三板沙增調三廣
選官民鄣勇羌土精兵赴浙直軍門并力擊倭江陰
知縣錢錚禦倭蔡涇間死之予贈廕祭祠浙江倭還
犯吳江俞大猷與參政任環擊勝之賊奔嘉興三板
沙賊出海大猷復與任環追擊之馬蹟山勝之藝其
餘賊上曰朕累言周琬不奈行陣今聞疾甚浙福提

督都御史李天寵嗜酒廢事其悉黜爲民遂改南京
戶部侍郎楊宜爲南京兵部右侍郎兼右僉都御史
代琬陞胡宗憲爲右僉都御史代天寵賜給趙文華
勅書關防令悉心督察軍務胡宗憲請遣人入海諭
倭禁其部夷母入寇兼伺誘王直焉從之使生員蔣
洲陳可願充市舶提舉以行上曰朕聞宣大二鎮米
價踊貴北直隸山東南麥熟其急倣昔人平準法
以濟民饑蔡涇閘倭至夏港鎮浙江副使王崇古擊
勝之七月懸賞格購斬虜俺答把都兒辛愛等大酋
及我叛人教虜者丘富趙全等倭自杭突至徽寧諸

縣入南陵蕪湖丞陳一道獨麾一軍與其僕子義死
之江南倭大載舟出海僉事董邦政與俞大猷追擊
焚之會颺作賊舟亦自壞賊還海港登岸劫掠新作
玄雷居成南陵倭流劫至蕪湖進逼太平至南京城
下以倭破杭州逮李天寵京師與張經湯克寬皆論
死繫獄造盧溝橋成以陶仲文先獻萬金助工加歲
祿千石八月倭自南京過秣陵關掠溧水柘林倭載
舟出海僉事董邦政總兵俞大猷分擊勝之上爲壽
奏示齊府曰今月十日小臣始誕躬覲大高玄殿前
期三朝爲首節後三辰慶周啓建金籙欽承玉眷大

祝七晝夜修設羅天寶醮三千六百分位仰惟父天
保命母地育生底宗子以成仙賜愚臣而得道慶臻
宗社禧衍家邦萬壽節命朱希忠攝拜天玄極殿羣
臣望朝奉天門上曰近得微王薦奏一道者獲太上
之玄其賜微王清微忠孝翊教輔化真人道號予之
金印道者賜名通妙散人給三品誥命溧水倭趨宜
興越武進抵無錫至滸墅關會柘林出海倭風飄之
還登岸據華亭之陶宅鎮蘇松巡撫都御史曹邦輔
恐滸墅寇與陶宅合督兵備副使王崇古集兵四扼
之僉事董邦政與把總婁宇盡殲其衆於楊林平之

九月趙文華以不得許墅之捷爲恨與胡宗憲自將
兵大搗陶宅乃大敗賊益熾掩不言及劾邦輔邦政
不進兵協攻趨易避難請亟罷黜之上下邦政總督
都御史問治頃之巡按御史孔昭以陶宅之敗聞給
事中杖濬先後言文華欺誕負簡命江南人稱邦輔
功不容口文華嫉妬人捷自掩敗邦輔不惟不得論
功且以罷黜請宜罪上竟不問命邦輔勦賊如故建
秋報大齋朝天宮三日夜虜大入山西諸處總督尚
書許論督兵遮擊之乃遯大同參將丁碧死虜子贈
瘞祭祠倭自海上至泊台州螺門都指揮王沛與參

將盧鏜盡殲之建秋報大典于大高玄殿七日虜入
宣府犯懷來保安參將馬芳夜衝其營於東嶺大驚
遁十月裕王長子生禮部請告郊廟社稷詔天下上
曰生太孫則然可不待上命自爲禮其遣告玄極奉
先二殿而已已羣臣疏賀上詰掌詹事府事吏部侍
郎閔如霖辭意藏謗降三級俸罷其玄撰命嚴嵩再
擇敬神而畏君者代之陶宅倭奔屯周浦曹邦輔督
兵攻之敗績建祈報大典于洪應雷殿六日殺張經
李天寵楊繼盛于市天下益惡趙文華及嵩父子十
一月壬辰朔日有食之倭犯莆田千戶戴洪高懷德

張鑾皆戰死宣防秋畢兵部尚書楊博言今歲虜
東犯遼東西犯山西宣府乃宣大總督許論等調度
督戰斬獲至五百三十餘級薊州總督王忬等多方
拒守制勝萬全皆望德玄威所及請擇吉告廟社敘
諸臣功褒賞之上曰上玄恩養不可欺背謝宜先天
地謝已更奏脩玄典于朝天等官廟抑邊臣防秋職
也乃欲歲一錄若僱募者然六科官其會議之議上
上曰將士親冒矢石有功賞固當督撫等官職調度
當有爲國任事之忠何輒互相稱引槩請陞賚敘及
多人以爲歲例豈政體者其姑與一歲繼自今必各

鎮戰守功次須巡按御史閱得實兵部乃許請海上倭二千餘入川沙窪與舊倭合焚劫浦東一帶丙午望月食倭自海上來屯海鹽人家指揮徐行健焚滅之倭自海上來犯平陽倭自海上來流劫樂清黃巖仙居餘姚上虞會稽諸縣守備劉隆指揮閔浴禦之於謝浦死之倭犯興化千戶丘珍楊一茂死之已復犯福清海口泉州衛指揮僉事童乾震直奔其壘斬十餘賊亦死之皆賜祠其地襲陞其子二級冬至羣臣望朝奉天門閏十一月統領川兵遊擊曹克新邀擊周浦倭勝之賊焚巢出海副總兵俞大猷等追之

老鸛嘴又勝之餘賊奔上海浦東曹克新擊倭屢戰
于嘉定之高橋兵潰越二日復整而大擊之又復大
潰敗倭犯上虞會稽者典史吳成器督衆勦滅之龕
山官軍盡平之嵯縣十二月選練南京衛軍一千人
使守京以都督段堂領之孝陵衛三千人使護陵以
豐潤伯曹松領之名二營曰振武開礦四川山東趙
文華擊賊無功謾言水陸成功江南清宴請還闕供
本職許之山陝河南地大震歷死官吏軍民奏報有
名者八十三萬有奇不知名者無數戶科左給事中
楊允繩御史張巽言劾光祿寺丞胡膏侵牟多金下

法司驗問膏以允繩謗上玄脩爲解上大怒詔逮允
繩等送鎮撫司掠治鎮撫具允繩獄不及異言上切
責曰旨云等也如何脫異言不治奪其俸皆下之法
司刑部尚書何鏊等坐允繩儀仗內訴事不實者絞
引例充軍膏妄費受贓爲民上詔廷杖允繩異言允
繩論絞如律頌繫之別降異言於外任建紫皇殿成
毀膏病上諭階本膏病猶尅入直敬畏天敬畏君也
茲聞其篤細邪之物快哉其傳示世蕃孝侍母怠處
犯神木參將楊璘死之賜贈蔭立祠

三十五年正月辛酉朔命朱希忠攝拜天玄極殿羣

臣望朝奉天門賜直臣衣曰卿等直侍朕家娛亦廢
它等猶不遂心孰非臣耶我下諭元輔計立帝建儲
我須閑元輔駭生疾天不可違我且止衣非正賜少
禦春寒焉守備王倫等扼倭曹娥江追殲之於三江
調河南兵禦倭令浙江練鄉兵二月以山陝河南地
震勅戶部左侍郎鄒守愚往祭其山川社稷城隍及
所在帝王陵寢領白金四萬從便宜賑之舉大祈歲
興七日趙文華還上言臣還時大都南寇已滅獨零
賊未盡殄耳上疑其誑數問嵩嵩爲支吾對文華因
言南寇所未盡滅者坐督撫楊宜不禡獨胡宗憲可

人宜易置宜用宗憲上然之會御史惟中劾問詔罷
之宜罷吏部尚書李默推南京戶部右侍郎王誥以
代文華既被上詰問因謀告許自解上言宗憲才實
可用尚書默故與臣異同臣劾張經經屬默同鄉思
爲之報復臣論曹邦輔默黨留之東南寇至未解皆
繇默不奉公推賢致是因摘默部試選人策目有引
漢武唐憲事實擬上懷謗訕上大怒下禮部三法司
及科道官皆覆稱默褊執失大臣體策目所引尤不
宜言上以其黨護切責尚書王用賓等各降俸三級
下默鎮撫司考訊刑部尚書何鰲遂坐默比子罵父

者律絞上曰律不著臣罵君謂必無也今有之矣其加等處斬錮于獄因黜宜爲民逮治曹邦輔以胡宗憲爲兵部左侍郎兼都察院僉都御史總督浙直軍邦輔竟坐戢默從獄中咽金死三月命大學士李本暫掌吏部事是時嚴嵩于世蕃專恣貪婪政以賄成趙文華一出江南之公私匱竭刑賞倒置士論惡此三人已甚嵩慮有它故欲排鋤其異已者本承嵩指上言近者當事用人遷擢一出貨營賢否盡徇愛憎以致庶績日隳南北多寇雖陛下焦思於上屢更數易未有能分主憂者兩京大小九卿及在外督撫諸

臣臣不識忌諱欲爲陛下分別其人定擬去留以請許之本因列諸臣爲三等吳鵬趙文華嚴世蕃陸炳馮天馭何鰲沈坤等二十八人爲上等鄢茂卿徐履祥趙貞吉等七十人爲中等楊行中葛守禮艾希淳郭黎陶邦脩等十有五人爲下等上皆如所擬已復命一體考察兩京科道官以聞卽亦皆如本請諸御史考察無害者人杖四十乃留之遂加本爲少保兼武英殿大學士以工部尚書吳鵬爲吏部尚書鵬舉趙文華自代從之仍加文華太子太保以賞訂發不臣功以國用不足推廣入貲之路建祈年禱雨醮于

洪應雷官百官素服辦事如脩省賊酋徐海擁諸倭復大至分數道入自浙東西至江南北彌滿海復導柘林賊陳東所部數千人逼乍浦焚舟登岸人各殊死戰倭入古田指揮使劉烱副千戶王月死之賜贈祠四月停刑止屠以禱雨雨降上悅嚴嵩率百官表賀倭破慈谿殺溫州同知黃釧軍民死者亡數千釧贈廕祠死所倭犯鎮江瓜儀等處大燒漕糧江北倭流劫至圖山無爲州同知齊恩率其子尚文嵩及其家人擊敗之遇伏力戰死倭復攻破慈谿餘姚省祭官杜槐死之皆賜贈廕有差俞大猷董邦政擊倭寶

山勝之佐擊將軍宗禮以河朔兵九百人擊乍浦倭
萬餘於崇德三里橋三戰三勝之徐海氣大阻會橋
陷軍潰禮與鎮撫侯槐何衝忠義官霍貫道皆死之
皆廢敘有差建謝雨典于雷宮三日上曰今大小官
以私情乘空銓除無數侍上者十百人中乃一二侍
讀訥修撰春芳供撰久勞其俱陞爲翰林院學士右
春坊右中允份文學可稱令人補撰文重玄事焉五
月倭乘勝燒劫桐鄉圍之浙江巡按御史孔昭請簡
才望大臣一人督兵應援且以爲南京保障從之勅
兵部右侍郎沈良才兼都察院右僉都御史行上故

數以江南倭詰文華至是復諭嵩令文華具舉倭實情對嵩知上覺其欺教文華自以其意請復視師嵩從中爲言收良才之命命文華總領涿保定河閒及河南山東徐沛等兵以往懸勸借賞格以備倭上曰古禮因事索鬼神焉南北欺犯其道大臣祭告于郊廟社稷行禮樂歌五成用性倭自慈谿入海聽撫賊毛海峰等助官軍追擊之魚山胡宗憲使人說下桐鄉賊徐海與陳東自攜乃退屯乍浦桐鄉之圍解遣通政王槐取礦玉旺峪益王厚燁薨勅建眞武殿於齊雲山六月造帝眞殿倭劫湖州等處蘇松倭遜出

海總兵俞大猷追擊大敗之浙江倭陷僊居趨台州副總兵盧鏜等擊勝之虜三萬餘騎犯宣府遊擊張紘迎戰死之一軍盡沒中軍官陳徭千把總繆策陳鎮張瑞等俱死之賜贈蔭有差開礦河南嚴嵩再滿九年考獎勅賜宴蔭一子七月建延生典高玄殿五十日取中庫銀十萬爲內供獻西苑雙穗穀於太廟徐海擒陳東等以獻海自退營梁莊以其乍浦巢安我我軍大破平之八月以徽王載堉不法追收故所賜其父恭王真人印萬壽節命朱希忠攝拜天玄極殿羣臣望朝奉天門舉承恩大典于內殿陶仲文顧

可學皆言芝入藥可壽命分採之玄岳龍虎鶴鳴三
茅齊雲及五岳諸山上曰當職者怠龍涎香多年訪
求未得故所遣廣東福建官記其罪趣之更遣一官
求之於雲南上曰芝與香亡論臣民得者許自獻死
平民誠獻芝五本賜銀幣胡宗憲大集保靖河朔永
保兵進勦徐海於梁莊大破之海沉河死而倭寇盡
平上曰王汪峪所進礦銀轉勝於初可仰承天地賜
更訪採諸未開之場顯金王露形胎太上玄風焉戶
部臣言聖德敷被帝錫佳寶不宜壅闕無用之地請
如旨宣示四川山東河南有司以稱天地降祥及聖

主足國裕民之意報可九月虜入遼東指揮劉洪臣
千戶黃相李承宗百戶管振死之廢徽王載瑜爲庶
人禁高牆除世封載瑜自殺杭州大火燔民舍三千
餘家上曰冬寒可念禮部止採芝民毋行禮部臣言
臣向未敢請今敢不如詔上曰爲近畿者耳玄岳諸
山採如故母後舉秋報大齋洪應雷壇七日以倭平
遣祭告郊廟社稷帝王神祇受百官表賀論平倭功
十月丙戌朔日食御醫果進玄岳仙芝賜綵幣虜十
餘萬駐牧大同邊外分入犯參將孫朝張環等擊却
之倭入詔安縣播州苗賊盧阿項等平十一月虜十

餘萬入遼東廣寧塞總兵殷尚質率遊擊閻懋官等禦之亡其卒千人力屈死皆賜贈廕祭祠上曰元輔嵩年七十餘忠順罔怠朕心弗安其免廷賀死直賜腰輿建景圓一陽二典于萬法殿十四日冬至羣臣望朝奉天門兩廣督撫侍郎談愷討平洞賊陳以明論功有差虜十萬屯青城分犯一片石三道關諸處總兵歐陽安拒却之十二月山東賊楊思仁平追贈許達三代祖父賜誥命獻陳東之俘虜犯環慶等處都督僉事袁正等率兵拒之俞大猷擊餘倭之駐浙東舟山者大破之倭盡平

名山藏卷之二十七

臣何喬遠恭輯

典謨記

世宗肅皇帝

三十六年正月乙卯朔命朱希忠攝拜天玄極殿羣臣望朝奉天門上曰景元祝典已詔諸司停封九日頃者朕受寒侵仰事上玄禮不可減其增脩七日展日而致敬二月虜入大同破拒胡堡南犯威遠平虜天城等村堡三月建大祈典于大高玄殿歲祈典于洪應雷宮各五日宛平民道等進靈芝賜布絹人五

匹巡按河南御史昭進五色芝二十八本上曰芝五色仰承天恩其進御虜寇延綏總兵陳鳳死之賜贈廢祠死所虜犯大同指揮楊汲百戶李潮死之皆賜廕四月虜大入永平遷安等處副總兵蔣承勛力戰死之越三日出境總督薊遼兵部左侍郎右副都御史王忬以聞兵部覆奏上曰虜殺掠近畿諸臣來不能拒去未見追爾等不從實參治顯有同遮之情其令御史覈之已御史惟平覈上上曰賊非時入犯旣預偵之矣乃今得利去王忬誇張力戰忠心大不如初姑降爲右侍郎兼右僉都御史懲欺怠焉因降革

它諸臣有差而予承勛祭葬贈廕祠死所火星逆行
二舍勅諸司脩省禳于洪應雷殿崇王載境薨丙申
奉天殿災華蓋謹身二殿文武二樓奉天左順右順
午門一時燬火兩日乃息羣臣疏懇報曰天垂無前
異朕戰懼若涉大淵罪在朕躬尚敢他飾子職畏親
惟有感眷爲順壬寅詔曰朕惟皇天身命暨二親貽
慶入奉大統三十六禩于茲矣曩大遭無前之內變
荷天恩赦祐以復生刻感難名身命是愛但賴臣勞
之一語原非虛寂之二端天心朕悉朕忠天鑒昨因
時旱禱澤于雷霆洪應之壇方喜雨膏隨有雷烈正

朝三殿延門及廊一時燼焉仰惟仁愛之篤垂總屬
朕躬之咎重下茲罪已用示臣民凡在位者首體相
關敬畏宜同未可肆幸樂之心要當場國民之念共
圖協恭勿乃我棄倭復至南通州攻城不克分犯如
臯恭興復有倭乘七艘自金沙登岸以殿災舉高玄
大壇典五日倭至揚州進犯高郵金沙倭犯如臯至
泰州諭禮工二部曰朝堂無不復之理當仰天慈勿
或賣直爲忠狃時作敬其先作朝門午樓焉五月泰
州倭犯揚州高郵倭犯寶應入之揚州倭犯天長入
之復入盱眙清河皆燒劫而去遂侵淮安府入劫安

東縣六月參將劉顯擊倭安東敗走之以財誅法官
吏冗員上諭禮部曰殿廷之災不及大內上天恩宥
朕當祇戴其舉醮乾清宮九日諸司停封如例停止
陝西採礦取中庫銀十萬備內供七月封益世子厚
炫爲益王詔順天府買辦珍珠并下廣東開採各四
十萬顆有奇八月萬壽節命朱希忠攝拜天玄極殿
羣臣望朝于端門總督都御史胡宗憲進鮮芝七十
本巡撫福建都御史阮鶚一百四十本巡撫江西都
御史馬森一十六本以賀壽上諭吏部曰直贊撰文
公希忠歲加祿百石伯承裕加少保都督炳少傅輔

臣嵩兼支尚書俸階加少傅本兼太子太傅尚書山
加太子太保侍郎朴瓚煒各加太子賓客仍與二品
服色除侍講二字學士訥春芳份各陞太常寺卿兼
翰職如故示嵩毋延謝上已稍聞趙文華視師江南
黷貨殃民狀至是責建朝門甚急欲以觀於述職之
臣四夷之使文華不能即奉旨滋不懌文華故拜嵩
爲乾子嵩告上曰師生屢爲言至是上諭嵩曰日以
望之夕召工部入理門樓木備建造乃諉諸未敢曰
未勅無專責者大臣不任事可見文華志不若昔今
聞其病生不諭責之不早成嵩計之嵩未知上意言

文華連歲視師致勞疾工正事繁請欽命專責者更
增設一侍郎佐文華部事從之文華隨上疏請假上
特命回籍養病以刑部尚書歐陽必進代之丁未興
重建午門工上曰人君百爲萬用靡匪天也我皇祖
名門奉天義取爾然已身坐之未安耳今兩蒙災示
決不可復禮部其集議門名聞是月晦日趙文華子
錦衣千戶恩懌上疏請送文華還家上建萬壽醮故
命停封盡八月而恩懌以是日具疏意計徹御在來
月上察而惡之九月朔上曰文華濫殺無辜生命朕
大有之以少寬任事之臣而勸後者朕吉脩停八月

封累諭矣廡恩澤未盡八月疏病告好欺褻也文華
姑革職爲民恩澤削官邊成之因責禮科都給事中
江等不參舉皆執杖之斥爲民下文華視師江南諸
不法狀示嵩曰卿勿以弟子爲意嵩佯驚惶恐對乃
罷是時中外鼓舞頌聖斷禮部類奏五岳及方內名
山所獲芝凡千本有奇殺口外民沈鍊蔭宣大總督
都御史楊順一子爲國子生上曰重建明堂事義至
大天神垂祐葦可久也何必曰楠杉堅朕聞正德中
視乾清工者不自謂怠乃曰皇兄在豹房令無亟朕
久不臨朝臣下欺上恐亦爾咎凡在臣民竭力盡忠

必速之毋以待殿材爲解取太倉銀十萬爲內供十月建秋成報典于大高玄殿五日再詔採芝于四方故禮部左侍郎朱隆禧卒家人請祭葬禮部執弗與上曰隆禧調護朕有功所進方藥香衲至今在御其特以恩許勿爲例上親告經始殿廷于大高玄殿而舉典十一月蔣洲說王直自倭至胡宗憲誘擒之直餘黨驚叛據舟山阻岑港自固虜擁衆數萬入大同右衛抵應朔懷馬一帶攻破七十餘堡殺掠甚衆巡撫大同都御史朱笈以聞命革總兵龔業職銜降笈俸三級使巡按御史路楷覈實總督楊順功罪以聞

順懼賂嵩父子自解以大光明殿成及景命修報遣
祭告朝天六宮上曰是典禮特隆重者諸司其停刑
止封吉服莅事自是日至子來月之朔毋怠毋欺冬
至羣臣望朝于端門興建大朝門工虜酋辛受黃台
吉夷婦桃松寨私通其部日懼誅來降楊順納之辛
受怒大掠大同塞圍右衛城請歸趙全丘富者易婦
順送與夷婦辛受竟不歸全富圍右衛自若十二月
祈雪朝天等宮廣東扶藜葵梅諸山峒賊馮天恩李
汝瑞等平山西平遙賊田武平以水災免遼東諸衛
所稅糧預發太倉銀五萬優卹之

三十七年正月庚戌朔命朱希忠攝拜天玄極殿羣臣望朝奉天門光祿寺火上曰天火也自馬從謙以來和黨日多茲其應矣下大官署正烜等於法司黜爲民虜圍右衛益急城中困甚上大慮之命發帑銀十萬賑濟雪嚴嵩等疏賀嘉答之倭犯潮州鄆縣散官王金聚芝爲山以獻曰仙應萬年芝凡百八十餘本有徑尺八寸者上悅賚金幣建首祝景度吉典於內殿九日御史路楷勘應朔報命言虜至楊順率諸將鎮等擊敗有功罪在朱笈龔業嵩爲言於上而順又得廕一子鎮等陞賞有差二月懸大工開納例有

錦衣衛匠餘岳輸金二千三百乞陞兵部奏授本衛指揮僉事子孫襲一輩兵科都給事中日新等言國家錦衣之職比古吾責非特恩不授無異功不襲縣官卽急財何至藉一工匠餘資濫朝廷名器上善之命改岳千戶奪兵部司屬官俸三月右衛急內賦匱竭戶部尚書方鈍憂懼不知所出乘間陳帑藏空虛狀因條便宜七事上曰鈍所議第可備將來安見有爲國憂思之忠可爲右衛應卒者鈍惶恐謝因命發太倉庫金五萬及紫荊關新城倉浮圖峪容兵米豆三萬石於大同以濟之建大祈典于萬法殿九日三

月上曰右衛危在旦夕朕甚念焉邊臣屢求糧餉戶部不時給好怠視也工部其暫齎工資贖罰等銀五萬於右衛二萬於薊鎮兵部發馬價銀一萬於宣府急濟之九卿科道官曾任巡撫二司及有司習知各省錢穀有可設法計處者各明白條奏大同戰守事宜及文武官有宜更置者兵部亦詳議於是別調朱笈龔業陞山西副使楊選爲右僉都御史代笈改山西總兵張承勛爲大同總兵代業蜀王承燭薊刑科給事中吳時來言總督宣大侍郎楊順莅鎮以來所請帑銀亡慮三十餘萬而該鎮兵食日見羸虛虜披

猖時往往殺愚稚民報首功不能一矢効尺寸納虜
逋婦論矜自多黠酋脅索取以予之失體損威臣民
歎憤而御史路楷受順賄金秘不以聞去冬虜屠應
州堡七十男婦死者千計卽楷初疏亦云及奉命勘
覆則爲之諉責守臣以所殺邊民侈爲順功兵部尚
書論雷同附奏濫予世廕無章甚矣夫近者大同右
衛上軫聖懷而當事之臣朋比不忠交相欺肆一至
於此臣誠恨之願陛下一大創此三臣者上密問嚴
嵩嵩比之上特命逮治順楷權代以兵部侍郎江東
因黜論爲民代以故兵部尚書楊博并改戶部尚書

鈍於南京代以刑部尚書賈應春遼東大饑人相食
預發太倉餉銀五萬優卹之建二祝景度吉典於內
殿九日御史儀望給事中祐言福建提督阮鶚獵取
浮譽以得美官行部所至幃帟盤盂率絲飾綺繡珍
寶日集金工鍛鑄疊庀修京師問遺倭入任其出沒
則加派繇賦遺金繪舟輿送之出境而已臣恐其罪
不止罷斥上大怒械治之京師既至黜爲民上曰今
右衛困極朕聞城中將變爾東用心急處毋誘諸權
代總督不待再推卽暫以尚書博往任之御史萬民
英奏臣巡視薊鎮見牆子嶺白馬關一帶邊牆皆荷

且倖成旋卽圯壞以故虜得乘之蓋今兵部侍郎吳嘉會故任巡撫時所築乞按覈錢穀之數論冒破罪上命錦衣先逮嘉會下獄遣科道官往按之已黜爲民虜寇永寧薊鎮宣府相繼告急命聽征官軍還營操練以備京師而少緩殿工之役詔恤京商刑科給事中吳時來刑部主事張狝董傳策交章論劾嚴嵩納賄誤國狀上曰時來所言順楮已行之矣彼本譏朕事玄怠政故先攻一二遠臣次及輔首必有主使同計之人錦衣衛其與狝傳策逮送鎮撫司訊究之已三臣百掠不承讞上俱發充軍嵩乞罷上優詔不

允四月楊順路措逮至刑部尚書鄭曉論順死措爲
民因奏時來言措受順金須勘證有則罪不止刑籍
上命繫順措獄命兵科給事中鄭茂往按之海上倭
大至犯台溫諸處及福建沿海府縣以右衛圍未解
復黜朱笈爲民禱龔業職下御史問之虜困右衛益
急上數問大學士嵩嵩意欲棄之不敢顯言上益命
措餉發兵前後動發太倉之儲數十萬計使兵部左
侍郎閔煦兼都察院右僉都御史督救之以遼東大
饑出戶兵二部庫銀三萬發賑胡宗憲得白鹿於舟
山以獻上悅賜金幣禮部請告廟受賀上曰今奸臣

叛民南北勾賊本謗我事玄天眷賜瑞固非一獨宗
憲人心不泯以此進耳其命希忠代獻太廟表賀已
之裕王妃李氏薨不稱薨曰故禮如壽定王繼妃吳
氏喪江東楊選張承勛大集主客兵嚴部奪右衛圍
虜悉拔帳北遯圍解上徵東還賜二品朱衣一襲論
選等功有差命楊博廣賑卹繕墩堡練丁壯計善後
畧從便宜具奏建景命瑞典於御仙宮九日倭攻福
清破之執其縣令舉人陳見率家僮禦倭不克與訓
導鄔忠涵被執罵賊死祈雨禳風於內殿倭攻惠安
縣知縣林成率丁壯禦之五晝夜乃引去逐之死于

山五月倭焚掠南安縣建三祝景度吉典於乾光
壇五日福建倭出海口港參將尹鳳等引舟師擊勝
之六月倭分犯興泉漳諸府攻福清南安二縣破之
遣督造薨器三萬於江西以備醮壇之用浙江倭分
掠樂清永嘉諸縣指揮劉茂朱廷綸千戶周賓李爵
劉源死之鄉官致仕僉事王德赴以義兵亦死之賜
德贈祠祭蔭茂等皆襲陞其子二級新建朝門午樓
東西角門左右順門闕左右門成權名朝門曰大朝
門建壽明殿於內苑七月建景祝吉典於大光明殿
七月初上從總督尚書楊博請以薊鎮一衛兵聽宣

大調遣總督侍郎王忬執奏薊鎮古北諸口川原平曠無險可守獨恃入衛卒擁護陵京奈何聽它鎮調發上曰故有旨令薊鎮練兵畫區守今八歲矣幸虜不至卽一卒不練每遇秋防專倚調發頻年遠戍糜糧餉歲復一歲何時已也兵部其遣一郎中與巡關御史閱數以聞遂命郎中唐順之往修景度四祝吉典于內殿十四日以岑港海寇未平奪總兵俞大猷參將戚繼光職級令胡宗憲督勦之封崇世子翊鐸爲崇王閏七月西苑進瑞穀獻廟受賀賜督理農事戶部侍郎高燿金幣楊順路措之被逮也獄成矣所

遣鄭茂特按其受金一事耳至是茂還言措受順金雖無證要吳時來言皆是順措宜重比先是順措相比爲奸朱笈不與聞也挑松寨之事笈順大左順等譖之大學士嵩別調笈笈未及代而順措已被逮人皆以爲快嵩心醜之笈黜爲民未慊也方順措逮時上怒嵩不敢解故示意刑部尚書曉請令茂出按以緩其獄及是茂還報上怒解曉乃阿嵩變其獄辭更免順死論戍措降邊方辭挿入笈逮之亦坐以順所坐於是物論大譁嵩父子胡宗憲再獻白鹿于齊雲山上曰一歲二瑞天眷非常命告謝玄極殿太廟以

宗憲忠敬陞其俸一級百官表賀大朝門旣成放休
工匠以來歲冬隙舉殿工焉禮部請賀上曰朕仰荷
天簡以宗人入承祖位非它所爲欺我之邪初則奪
親誣天至今尚非一二近二藩作逆無君去年火燃
朝堂不臣者方相慶自得誇衆享玄廢朝信方士近
佞臣也何賀之爲以壽明殿成及聖旦屆期建祝延
典於內殿停常封蓋八月建六齋朝天宮三日夜八
月萬壽節命朱希忠攝拜天玄極殿羣臣望朝大朝
門虜犯永昌涼諸州圍廿十四日乃遁庚申月食虜
犯宣府赤城等處遊擊董一奎等帥兵禦却之把總

馮尚才戰死九月上諭嚴嵩曰古人三十卽求補益
况年老氣衰太上孔子皆示人以妙不可違焉人元
之丹比金石勝卿當服之建秋報于萬法殿九日唐
順之閱視薊鎮還報命上曰各區缺兵至三萬不補
且一卒不練督撫官何職也王忬及總兵歐陽安其
各降俸二級令嚴督將領取見實練之歲以五月
奏請遣閱視期以三年有成不則科臣參劾之十月
岑港倭巢柯梅胡宗憲屢討之不克南京御史珊等
劾宗憲私誘王直老師縱寇濫叨功賞請追奪之上
下廷臣集議其去留議上卽手答曰妖逆賊直罪浮

賊全富本宗憲計獲之會彼奏上玄瑞小人嫉功遂爾有言朕下諸疏付丞弼議擬用存公論乃亦不分是非明功罪也宗憲其用心平賊如舊副簡眷焉未幾宗憲上疏自辨上報曰卿討獲妖賊人所皆曉特以獻瑞故人不取指引特引軍事害卿耳卿宜竭誠展布以平餘氛不允所辭禮部類進四方芝千八百六十有四本詔更廣求徑尺以上者命唐順之往視師浙江與胡宗憲協謀勦賊泗水湧出大木一命昇京造殿東虜大寇遼陽清河等堡總兵楊照副總兵劉岳帥諸將分擊勝之西虜亦擁衆濟遼外聞我兵

既東乘間深入照復馳赴之虜亦引去北虜土蠻十
萬騎薄界嶺口建昌副總兵馬芳禦却之虜更分掠
邊山等處把總馮時雍死之其明日虜還奔界嶺口
芳及總兵歐陽安等力戰敗之論功卹錄有差十一
月冬至以夜寒賜執事郊壇官金幣明日百官望朝
大朝門柯梅倭駕舟出海總兵俞大猷等自沈家門
引舟師橫擊之倭遁入閩廣問勅三法司曰刑以弼
治當則氣協麻祥自至否則上干災沴生焉是以古
帝王及我祖宗罔不慎斯朕固本所天爲民造福矜
卹庶獄愴愴於懷何近年以來司獄失人深文鍛鍊

甚或賄囑顛倒是謬近安陸幼男一魁二命枉刑母
又被捉情無所告遠叩朝扉以一推之豈止百數爾
三法司宜體朕心多思於卹都察院通行撫按申飭
司府州縣省改前愆天地神祇照鑒在上惟公惟慎
自能保祿而呂後如不恭命明法幽譴必不一追欽
哉丙戌上親禱雪洪應雷宮丁酉雪羣臣表賀十二
月初命都察院歲差御史一員稽劄光祿寺錢糧月
籍支費進覽

三十八年正月癸酉朔命朱希忠攝拜天玄極殿羣
臣聖朝大朝門倭千餘人突犯饒平海豐攻破黃岡

城流劫海陽潮陽惠來等縣以大學士嚴嵩年八十
賜肩輿直苑支伯祿嵩辭詔歲給祿千二百石如先
朝兵部尚書靖遠伯王驥故事贈集鄉兵殺倭者永
嘉縣良醫王沛爲太僕寺丞千祠贈廢二月建春祈
典于朝天宮歲例祈年典于大高玄殿各三日丁巳
月食廣東倭犯詔安漳浦虜酋把都兒等率衆數萬
進逼三屯三月入潘家口自遵化東掠至遷安薊州
玉田屯五日乃去逮繫總兵歐陽安等九人論死停
總督薊遼保定都御史王忬俸降順天巡撫都御史
王輪二級外調之遵化民張應相李朝舉李梅張冲

靈張德寶汝楫麻鑑等力戰死虜子贈官廣東賊流劫歸善等縣倭自象山犯浙西副使譚綸擊敗之倭既遜入閩廣間福建人大譟謂胡宗憲嫁禍於閩宗憲參論總兵俞大猷不感倭柯梅坐令得奔毒兩省間詔逮大猷京師治之戊戌親禱雷雨官辛丑兩百官表賀告謝六官廟倭犯崇明四月掠揚州海門等處裕王長子翊鉞薨進封爲世子祭葬如世子禮倭大入福建沿海諸郡攻福安破之江北倭趨通州總兵鄧城禦之敗績指揮張谷死之倭遂進據白浦鎮巡撫貴州都御史郭翀擒得普安賊李昂等論功有

差副總兵盧鏜攻北倭于三沙勝之福建倭圍福州
城參將黎鵬舉擊勝倭于海中刑部左侍郎楊大章
告病上疑其詐命太醫院官驗實乃放還先是江北
副使劉景韶擊白浦倭三勝之倭大聚其衆謀西犯
揚州景韶復追殺之潘家莊而通州倭盡平倭大屯
廟灣合攻淮安巡撫右都御史李遂督參將曹克新
等大戰于姚家蕩大敗之餘倭仍保于廟灣上悅賜
勅獎遂劉景韶追擊倭于印莊乘勝追擊于新州焚
之新河口而江北流倭盡平以唐順之爲通政仍與
胡宗憲共事盜火太原公解五月倭犯寧紹台溫是

時江北倭惟廟灣大屯未平李遂環攻以困之唐順之以爲玩寇持兵先軍我兵死傷甚衆倭解福州圍燒劫同安縣巡按直隸御史方輅論劾總督都御史王忬虜屯會州已有謀報忬身任總督重臣所當居中調度令人力捍之潘家口要衝乃信詒言輕身東援虜騎已西我反東阻復縱中軍私調將官更易主令人馬奔疲節制失策宜亟黜爲民上曰忬官久怠賊其逮治之京師代以總督宣大山西兵部尚書博既逮至下鎮撫考訊法司當忬罪戍邊上曰諸將皆斬繇軍令指揮之誤出令者顧不治擬律如此耶乃

下獄論死倭攻永福破之福建山賊突劫永平恭寧
龍巖歸化等縣永定知縣許文猷汀州通判郭子進
督兵勦平之裁冗官更建玄聖五龍亭廟灣倭被圍
日久劉景韶載葦焚舟嚴兵逼之賊潛出海遯而江
北倭盡平大學士徐階滿九年考改吏部尚書賜獎
勅六月親祈晴洪應雷宮詔百官齋三日以陶仲文
八十遣使存問加官其子與五品服俸虜犯宣府東
西二城住內地旬日乃引去丙寅雷擊奉先殿外南
西牆七月命總督倉場侍郎具銀庫出內之數每兩
月進覽三沙倭繇海門縣七星港突犯江北參將丘

陞死之予贈蔭襲祠劉景韶擊七星港倭于揚州火
之賊宵遁八月京師大霖雨祈晴于雷殿萬壽節命
朱希忠攝告天玄極殿羣臣望朝大朝門李遂獻白
兔二告太廟甲寅月食雲陰不見副總兵劉顯破江
北倭于白駒場盡殄之遼東饑遣御史齋太倉銀六
萬兩名糴賑給之九月修顯陵及飛龍等殿工成建
秋報大典大高玄殿十月設廣陵縣以瑞雪及秋祥
疊降詔法司停刑太玄都殿成十一月許朱熹裔孫
以博士奉祀婺源者世襲建一陽欽天寶典大高玄
殿九日冬至羣臣望朝大朝門改陝西州屬渭南醴

泉隆德洵陽石泉沔諸縣隸府十二月辛丑親禱雪
內殿雪上悅百官表賀贈故蘇松兵備右參政任環
爲光祿寺卿祠蘇州廕其子名揚博選特加秩少保
三十九年正月丁卯朔命朱希忠攝拜天玄極殿羣
臣望朝大朝門建啓籙迎恩典大高玄殿二十五日
虜犯宣府洗馬林等堡副總兵馬芳拒却之盜入泰
興二月舉歲祈禋典大高玄殿三日胡宗憲謝上王
直獄命臬示之浙江兵部議擒直賞上曰玄祐也不
奏謝人心歟命告玄極寶殿而論宗憲等功有差修
都城總兵徐仁等擊虜舟山勝之上曰財用今不若

祖宗時何也朕覽戶部所上籍入少出多嵩其與尚書坤議之何有長算可得充者修祈年典洪應雷宮七日故春坊中允郭希顏上書請分封景王以安儲貳疏引往歲聖諭有建帝語上諭嵩曰立子爲儲是矣帝當誰建耶今不忠之臣不義之民不言君而攻相以君相久位矣朕欲下希顏疏於諸大臣則謂大臣諛也其下議之耳目官於是禮科都給事中璧等議上坐希顏妖言惑衆律卽其家斬之傳首天下以水災賑順永饑民倭劫潮州三月琉球使請封者言寇方擾海請自齋詔冊還不敢勞使者不許國子監

祭酒沈坤家居跌宕負氣鄉人惡之南京御史林潤以風聞奏坤居鄉暴橫狀命逮京繫治之坤竟死獄中南京振武營軍以索糧譟亂逼總督侍郎黃懋官私第殺之上聞逮治爲首者使南京戶科奏所以上曰今小民無怨君之念多爲臣者求改新政快意耳朕覽南京事若五堡初作非軍敢爲皆臣使之張文錦猶可諉無心黃懋官卽郭希顏沈坤輩欺天無君故違不爲懋官勒減軍士糧雖死罪首也其追革職爲民以副都御史鄔懋卿清理天下鹽運求五色盈尺芝於天下虜屯喜峯口窺薊鎮大同總兵劉漢出

塞掠之于灰河始遠徙以近畿饑流民多就食京師者詳議賑濟事宜虜五百餘騎攻陷廣寧中前所殺千百戶各一人虜大入寇一片石等關參將佟登遊擊胡堯燾指揮谷承功守備牛相等禦却之出關至芝麻灣而還各論功有差上諭兵部朕聞四方盜賊蜂起有司欺怠不問其亟示撫臣督屬撫勦務俾除靖有不悉心者以名聞建新民醮洪應雷官十五日四月南京兵部侍郎李遂擒得振武營亂軍山等二十五人下兵部當山等梟斬不待時上命三法司與科道官詳之改以秋後決上曰廉無自遠之理必因

堂高士卒辱大臣當斬若時君立新帝者必法外凌
遲矣但黃懋官心存欺謗全屍而死失刑已甚茲所
獲亦未果知當否其再議乃僅坐首惡三人餘皆發
戍邊未獲者悉貸之賑順天饑民追賜岳懷王名曰
厚熙以便醮壇追薦復設都御史一員提督南京糧
諸改督漕右副都御史章煥爲之虜犯遼東廣寧大
掠而去套虜寇寧夏河東毛不刺諸處總兵趙應禦
却之五月賑山西饑民福建山賊倭夷並起攻掠平
和詔安等縣破崇武所城復起王邦瑞爲兵部尚書
協理京營戎政六月建天寶大典于大高玄殿停常

封至八月二十日止七月虜犯薊州遊擊胡鎮等擊破之禱雨宮中大同總兵劉漢俞大猷擊虜板升破之論功有差取太倉銀二十萬爲內供章煥故巡撫河南旣得督漕之命將行言中州妖盜並興失今不圖恐成大患因上經畧中原疏八事上以言之一統全盛之時心厭焉唐王宇溫薨八月上曰直贊諸臣効誠年久未有加與何以重君上事帝之典公希忠賜爵祿二臣嵩炳各歲加祿米二百石二輔階加太子太師本加少傅秩宗山加少保卿貳朴瓚煒各支正二品俸少卿訥春芳份各陞禮部右侍郎兼學士

嵩子世蕃仍兼支尚寶卿俸以答朝夕左右之勤胡
宗憲獻芝草五白龜二上悅特命賜白金五十兩金
彩鶴衣一襲禮部請謝玄告廟許之建萬壽大齋朝
天宮三日夜萬壽節命朱希忠攝拜天玄極殿羣臣
望朝大朝門戊申月食上嘉郭朴直贊恭慎特加太
子少保以爲南禮部尚書朴言臣幸效誠玄撰不願
遠闕上說玉龜亡上曰天降靈物朕固疑其塵寰不
久設興安縣九月虜寇大同越關大掠五臺崞縣建
安神異典大玄都殿七日秋報大典大高玄殿三日
玉熙宮成虜犯朱脂諸縣十月建金籙酬恩秋報大

齋朝天宮三日夜永壽宮成東川營長阿堂與霑益
土官九鼎相攻巡撫都御史游居敬調兵勦之巡按
御史大任言居敬不待會勘輕動五萬師莫不可成
功恐生意外變命逮訊之已謫戍邊建秋成典於洪
應宮命景王之國詔兵部嚴督所司捕畿內盜上曰
今秋天降奇祥仰欽恩賜其暫免行刑以臨德天津
三倉米賤饑民封蜀世子宣圻爲蜀王趙王厚煜自
縊薨十一月南京給事中負圖劾糧儲都御史章煥
赴任遲延上故厭煥前疏下旨曰章煥專事談論久
欺謗其逮治京師旣至謫戍之親禱雪雷宮千步廊

火將郊上諭禮部曰朕敬天不怠郊祀大重事其命百執事益恭虔冬至羣臣望朝大朝門倭攻永春陷之流劫德化同安漳平間十二月以雪未應遣祭告玄極宗廟社稷及各宮廟上諭戶部朕聞民死凍餓甚衆其卽發倉米萬石糜之尤饑寒者給食一器更與米一升露死者五城御史令掩瘞之陶仲文卒加贈特進光祿大夫子諡賜祭十壇葬之以伯禮陸炳卒追贈忠誠伯子諡賜祭廕雪嚴嵩等表賀陝西巡撫都御史軌巡按御史秋得白鹿於商南山萬壽宮前芝叢中遂致鹿獻芝賜鈔幣虜掠海蓋熊岳等堡

指揮李元勳死之錄一子賜立祠祭葬倭陷潮州
四十年正月壬戌朔命朱希忠攝拜天玄極殿羣臣
望朝大朝門虜大寇五花營守備王世臣千戶李虎
等迎戰於永橋敗死告軌等所獻鹿芝於玄極太廟
二月辛卯朔日有食之微陰不見欽天監官言微陰
不見同不食上悅禮部尚書吳山救護如常禮上不
悅山引罪上曰山守禮之臣也當科官何不參者其
以狀對禮科都給事中東華等惶恐引罪上住爲首
者俸罰其餘半年遂行謝典于大光明殿三日禮成
羣臣表賀發臨德徐三州倉賑濟南六府江西賊馮

天爵等平建春祈大典大高玄殿三日趙王自益王
妃與其子載堉移誣彰德知府傅汝礪通判田時雨
以奏詔逮京拷問已戍汝礪極邊械時雨還斬於河
南景王之國免面辭二朝上諭禮部春冷人疾其令
太醫院散藥九門至于夏至風上曰其兵火博示諸
臣戢宥而嚴邊居有間上諭嵩博言諸邊有備足無
患今天風復旬日恐不可不預慮吏部左侍郎茅瓚
病足久告上問嵩瓚懼言臣所患肢體末疾行差矣
當卽出敢再乞數日告上曰鈐曹非養痾地其令去
發天津通州兩倉米二萬一千石于順天永平太倉

白金萬五千兩于保定河間等六府賑濟重建祈年
典于洪應雷宮七日以伊王宮垣僭制命毀之廣東
惠潮山賊起流劫海豐歸善等縣三月發米萬石賑
饑民流移入京師者南京錦衣衛指揮繼勳得白兔
於鳳陽鳳凰山下以獻遣告于太廟羣臣賀建萬春
宮命禮部尚書兼翰林院學士煒直苑撰玄四月上
曰朕聞藥不投病餒民反傷又貧弱無濟有力濫與
失朕下令意其傳示小民知執事者過也抑民饑流
入京師皆守土有司失職不賑恤其出內庫制錢三
百萬量地遠近與爲歸資撫按官嚴督守令招集安

撫之大風雨黃土晝晦命百官修省順天府致敬而
求霖安遠龍南盜起山西饑發太倉銀五千賑之以
雨未足遣大臣分告諸宮廟百官素衣齋宿禁刑屠
九日以得霖日止分遣使者六人建萬壽醮于玄岳
鶴鳴龍虎齊雲三茅王屋諸山道士十一人齋香帛
於各省撫臣祭鎮海河瀆山川之神命鎮守湖廣安
遠侯震醮承天玄佑宮五月以旱霾災命大小九卿
自陳南京池河新營兵變雨羣臣賀閏五月吉王載
均薨嚴嵩妻夫人歐陽氏卒上命禮臣破例子卹典
時世蕃無意歸制嵩乃言臣老獨子不可無侍者上

許世蕃無歸令其孫鵠護喪往六月癸酉月食建仁
和宮七月己丑朔日食一分五杪禮部尚書袁煒言
臣聞唐一行曰日君道也無朏鬼之變古之太平日
有不食月或變行避之或五星潛互其下禦侮而擁
之或涉交數淺或在陽曆陽盛陰微則不食或德之
休明而有小眚焉則天爲之隱雖交而不食此四者
皆教所繇生也皇上父事天兄事日羣陰退萬象輝
是以日佐班榮陰氣銷鑠食一分與不食同臣等不
任懼怖之至上悅閩廣流賊突入江西掠萬安太和
諸處副使汪一中等戰死賜贈廕祭葬立祠勅諸臣

勦捕賊賊火玉山攻永豐破之以萬春宮成建迎思
與于大高玄殿禁常封三十有四日上曰間者天降
祥禾御田四十九本今歲五月恩滋應祈是日玄育
生瑞當知恩也禮部請獻太廟從之八月建萬壽大
齋朝天宮三日夜萬壽節命朱希忠攝拜天玄極殿
羣臣望朝大朝門上曰自博名入朕恒慮邊今秋恐
有擾者嵩其語博先遏之建秋報大齋大高玄殿三
日九月廣東賊張璉等襲攻南靖入之福建山賊襲
破鎮海衛城虜十萬餘騎犯居庸岔道口官兵禦之
故總兵官姜應熊先進遇圍被創墮馬參將胡鎮力

戰奪之虜遁去廣東賊攻陷福建崇安犯浙龍泉固原寧夏地震傷人發太倉白金八千賑恤之總督薊鎮保定都御史楊選條陳邊務下兵部覆上上曰薊鎮總督等官遇警輒張皇請調兵初謂權宜今十有一載矣未見減撤加挑選焉供餉繁費何時已卿博歷任薊遼宜竭盡忠謀如何練主兵乃可免調邊兵者大破格整理之再以方畧聞上曰夏霖應禱秋稼賜祥朕感玄麻其暫免今歲刑囚繫獄如故十月闕廣流賊自邵武轉掠鉛山貴溪等處參將戚繼光破之山坊巢賊奔寧德還攻宜黃爲南贛兵所敗始道

建壽光閣封唐世子宙棟爲唐王增城人湛壽魯爲其祖故南京兵部尚書若水乞贈官丁吏部覆尚書歐陽必進言若水學問醇正士望所歸宜許贈如壽魯請上曰若水僞學亂政必進浮譽之奪其散官侍郎郎中以下皆停罰有差上以宣薊二鎮兵餉匱竭使薦大臣有才望者往理吏部以總督倉場戶部右侍郎林應亮名上許之兵科都給事中益言應亮愿人也不足於敏達上下大臣再推因升右僉都御史霍冀爲戶部右侍郎兼右僉都御史以往調應亮南京頃之益復言戶部有兩侍郎曰劉大實趙貞吉廷

推不及乏才故也宜使致仕吏部覆如益言上皆命
閒住責吏部尚書歐陽必進對狀曰二位不堪何不
先言降必進俸二級侍郎張永明一級司官各奪俸
二月禮部類奏四方所進芝凡七百六十九本命明
歲加意採五色盈尺者淮王獻白鴈二賜金幣上曰
天降祥羽其廟告十一月冬至以天寒賜攝郊者都
督朱希孝御衣明日羣臣望朝大朝門禮部缺尚書
會推及郭朴上責歐陽必進頴恣擅改玄撰臣令致
仕卽以朴代之上曰深冬未見正白農民切望朕竭
誠禱雪焉會大風上曰其禳風而禱雪停刑禁屠百

官同之虜入寧夏進逼固原循下馬關而西掠數日
乃遁上所居永壽宮災嚴嵩請徙南城焉南城者英
宗之御也上不懌乃移御玉熙宮上曰朕御皇初宮
二十餘禩大變蒙恩久安玄事茲荷庇益感眷其以
下月擇日謝郊廟社稷如常儀禮部請詔示天下百
官齋戒脩省上曰非正朝也十二月御馬房火燬九
十餘楹工部尚書雷禮言玉熙宮殿墊隘不稱御居
永壽宮成祖之舊宮也受命重地王氣攸鍾偶值災
變天啓皇上鼎新丕基永延于萬祀請及時營繕以
承明眷上曰日謝罪郊廟風藏氣爽皇天其赦憫朕

以命大學士徐階與工部侍郎衡董其事月食親禱
雪于凝道雷軒上復自玉熙宮徙居玄都殿聞京師
內外多盜命朱希孝領官較兵部左侍郎葛綰領管
兵入衛命巡撫官嚴督所司捕盜而撫民